

DOMINGU II TEMPU KOMÚN – TINAN B

TEMA

Liturjia Domingu II Tempu Komún nian propoin reflesaun ida kona-ba disponibilidade atu hakohak Maromak nia dezafiu sira no atu tuir Jezús.

Leitura dahuluk apresenta mai ita istória Samuel nia bolun nian. Autór reflesaun ne'e nian deskreve momoos katak bolun mak nafatin Maromak nia inisiativa ida, ne'ebé mai hasoru ema no bolu nia ho nia naran. Ema presiza de'it iha atitude disponibilidade total nian atu rona Maromak nia lian no nia dezafiu sira.

Evanjellu deskreve Jezús nia enkontru ho dixípulu dahuluk sira. Sé mak Jezús nia “dixípulu”? Sé mak bele integra iha comunidade Jezús nian? Iha João nia perspetiva, dixípulu mak ida-ne'ebé iha kapasidade atu rekoñese iha Kristu, Mesias libertadór ne'ebé liu, ida-ne'ebé disponivel atu tuir Jezús iha dalan domin no saran an nian, ida-ne'ebé aseita Jezús nia konvite atu tama iha nia uma no moris iha komuñau ho Nia, ida-ne'ebé iha kapasidade atu fó sasin kona-ba Jezús no haklaken Nia ba maun-alin sira seluk.

Iha *leitura daruak*, Paulo konvida sarani sira Corinto nian atu moris ho forma koerente ho bolun ne'ebé Maromak halo ba sira. Iha fiar-na'in ne'ebé moris iha komuñau ho Kristu, tenke manifesta nafatin moris foun Maromak nian. Hodi aplika ba área seksualidade nian – kampu ida ne'ebé sarani sira Corinto iha frakeza boot – signifika katak tenke halakon husi moris sarani nian hahalok no toman aat/dezordenadu sira.

LEITURA I – 1 Sam 3, 3b-10.19

Livru Samuel nian refere ba época ida ne'ebé marka Maromak nia Povu nia istória. Akontesimentu sira haktuir iha livru ne'e abranje tempu husi sék. XI mK nia klaran to'o David nia ukun nia rohan (972 mK) no fó vizaun global dalan ne'ebé Maromak nia Povu halo hahú husi konjuntu tribu autónomu sira no lahó ligasaun entre sira, to'o tempu uniaun nian iha David nua ukun.

Kapítulu dahuluk sira Livru Samuel nian situa ita iha faze pré-monárkika. Ne'e mak época ida paradoksál no nakonu ho ambiguidade... Husi sorin ida, observa prosesu ida sedentarizasaun (tuur-metin), konsolidadasaun no unifikasaun tribu sira iha território Canaan nian, liuhusi elementu unifikadór sira, hanesan “juíz sira”, halo paktu atu hasoru inimigu komún, federasaun tribu sira hela besik ba malu no santuáriu sira ne'ebé simu Arka Aliansa nian hodi tau baze ba fiar monoteísta; husi sorin seluk, observa mós frakeza koligasaun defensiva hasoru inimigu sira, falta konxiénsia unitária, “juz” ruma la iha hahalok di'ak (Eli nia oan sira, hafoin Samuel nia oan sira)... Instituisaun tribu nian la iha kapsidade atu hatán ba eziyénsia foun liuliu presau militar filisteu sira nian. Modelu monárkiku povu viziñu sira hahú dada Maromak nia Povu nia atensaun nu'udar solusaun ideál atu hatán ba dezafiu sira istória nian.

Samuel mosu iha tempu kaos nian ida-ne'e. Nia hola parte ba tribu Efraim nian – katak, tribu ida iha país nia sentru, iha foho Efraim (iha-ne'ebé Samuel hala'o ninia ministériu). Livru Samuel nian apresenta nia nu'udar “juíz” ida (haktuir oinsá nia inan ko'us nia tuir modelu Sansão nia moris nian – 1 Sm 1; kf. Jz 13); maibé haktuir katak nia simu edukasaun iha templu Silo nian, iha-ne'ebé hatuur Arka Aliansa nian (1 Sm 2,18-21) – no ida-ne'e signifika

katak nia hala'ó funsaun litúrjika mós. Ikusmai nia simu bolun, iha período dezolasaun nian, atu lori Povu ba hafunu hasoru filisteu sira.

Samuel mak figura kompleksa ho funsaun barak: juiz, amlulik no xefe ezérsitu nian. Nia sai nu'udar ponte entre época konfuzau nian no falta konxiénsia unitária nian ba época ida iha-ne'ebé hahú estrutura organizasaun ida ne'ebé sentralizadu liután.

Testu ne'ebé ohin propoin nu'udar leitura dahuluk apresenta Samuel nia vokasaun. Epizódiu ne'e akontese iha templu Silo nian, iha-ne'ebé Arka Aliansa nian horik bá. Samuel, ne'ebé nia inan konsagra tiha ba Maromak, mak servidór templu nian.

Ba ita-nia autór, Samuel nia bolun marka inísiu movimentu profétiku nian... Molok ne'e "Na'i ko'alia dalaruma de'it no ladún mosu vizaun sira" (1 Sm 3,1); hafoin, "Na'i kontinua hatudu An iha Silo. Iha-ne'ebá mak Na'i mosu ba Samuel, hodi hatudu ninia Liafuan" (1 Sam 3,21).

Kuadru vokasaun Samuel nian, la'ós reportajem jornalística ida faktu sira-nian; kuadru ne'e mak reflesaun ida kona-ba Maromak nia bolun no ema nia resposta, hakerek tuir eskema típiku relatu sira vokasaun nian.

MENSAJEN

Nota dahuluk ne'ebé presiza subliña iha istória vokasaun Samuel nian mak ne'e: vokasaun mak nafatin Maromak nia insiativa ida ("Na'i bolu Samuel" – vers. 4a). Maromak mak, tuir kritériu sira ne'ebé ita la komprende maibé ba Nia halo sentidu, hili, bolu, interpela, dezafia ema. Indikasaun katak "Samuel ladauk koñese Na'i tanba, to'ó oras-ne'e, Na'i nia liafuan ladauk fó sai" (vers. 7) sujere momoos katak Samuel nia bolun mak Maromak nia insiativa mesak.

Nota daruak mai husi enkuadramentu temporál bolun nian: Maromak diri je ba Samuel enkuantu nia toba hela, karik iha kalan. Ne'e momentu silénsiu nian, hakmatek no kalma nian, bainhira tarutu no konfuzau sira nonook. Nota sujere katak Maromak nia lian sai fasil liután ba ida-ne'ebé simu bolun durante silénsiu, bainhira ema nia fuan no neon abandona preokupasaun ho problema sira moris loroloron nian no sai livre no disponivel liután atu rona Maromak nia apelu no dezafiu sira.

Nota datoluk kona-ba forma oinsá prosesa resposta Samuel nian ba Maromak nia bolun.

Uluknanai, autór testu nian subliña Samuel nia difikuldade atu rekoñese Na'i nia lian. Jahwéh bolu Samuel ba dala haat no iha dala ikus de'it mak joven ne'e konsege identifika Maromak nia lian. Faktu ne'e subliña difikuldade ne'ebé sira ne'ebé simu bolun hetan atu identifika Maromak nia lian, iha lian no apelu barak nia leet ne'ebé loroloron dada ema nia atensaun no babeur nia.

Hafoin, subliña Eli nia papél iha joven Samuel nia deskoberta vokasionál. Eli mak komprende "katak Na'i mak bolu labarik ne'e" no nia mak hanorin Samuel atu loke nia fuan ba Jahwéh nia bolun ("se bolu ó dala ida tan, ó hatán: «ko'alia ba Na'i, ita atan rona»" – vers. 9). Parte ne'e hatudu katak dalabarak, maluk sira ne'ebé iha ita-nia sorin iha apél desizivu atu kapta Maromak nia vontade mai ita no tulun ita atu sai sensivel ba apelu no dezafiu sira ne'ebé Maromak apresenta mai ita.

Finalmente, autór tau iha relevu disponibilidade Samuel nian atu rona no simu Maromak nia lian: "ko'alia, Na'i; ita atan rona" (vers. 10). Iha mundu bíbliku, "rona" la signifika de'it rona ho tilun; maibé signifika, liuliu, simu iha fuan no trasforma buat ne'ebé rona iha kompromisu moris nian. Samuel iha-ne'e, dehan ba Maromak katak nia dispostu atu simu Maromak nia apelu no dezafiu sira no halo tuir. Samuel hateten ba Jahwéh katak nia aseita atu hakohak dezafiu profétiku no sai sinál moris Maromak nian, sai Maromak nia "lian" ba nia Povu nia moris no nia istória.

LEITURA II – 1 Cor 6,13c-15a.17-20

Iha ninia viajen misionária daruak, Paulo to’o iha Corinto, depoizde vizita parte boot Grécia nian, no hela iha-ne’ebá besik fulan 18 (tinan 50-52). Tuir Apóst 18,2-4, Paulo hahú serbisu iha Priscila no Áquila nia uma, kazál ida judeo-sarani nian. Iha sábadu, nia ko’alia iha sinagoga. Ho Silvano no Timóteo nia prezensa iha Corinto (2 Cor 1,19; Apóst 18,5), Paulo konsagra an tomak atu haklaken Evanjellu. Maibé la kleur de’it nia iha konfliktu ho judeu sira no sira duni sai nia husi sinagoga.

Corinto mak sidade foun no próspera liu. Iha portu rua tasi nian, ho karakterístika típika sidade marítima nian: populasaun husi rasa no relijiaun hotu. Ne’e mak sidade ida iha-ne’ebé mariñeiru sira ne’ebé kruza Mediterráneu mai buka prazér, depoizde fulan barak iha tasi laran. Iha Paulo nia tempu, sidade iha mahorik 500.000, no populasaun lubuk ida moris nu’udar atan. Ema uitoan nia rikusoin kontrasta ho ema maioria nia moris-mukit.

Nu’udar rezultadu ba Paulo nia pregasaun, moris comunidade sarani Corinto nian. Membru maioria orijen grega, maski ema husi kondisaun kiak (kf. 1 Cor 11,26-29; 8,7; 10,14.20; 12,2); maibé mós iha elementu husi orijen ebraika (kf. Apóst 18,8; 1 Cor 1,22-24; 10,32; 12,13).

Komunidade mak comunidade ida moris no larna-manas; maski nune’e, sira moris iha perigu ambiente korrutu ida nia laran: la iha morál (kf. 1 Cor 6,12-20; 5,1-2), gossip, istori-malu, funu malu (kf. 1 Cor 1,11-12), babeur husi sabedoria filozófika orijen jentiu nian ne’ebé tama iha Kreda ho vernís sarani superfisiál ida (kf. 1 Cor 1,19-2,10).

Komunidade Corinto forte no iha kbiit, maibé tau abut iha rai inimigu nian. Iha sidade nia sentru, templu Afrodite nian, maromak-feto domin nian husi Grécia, sada peregrinu sira no favorese moris laho regra no libertinajen sekzuál. Sarani sira, ne’ebé moris iha mundu ne’e ikusmai lori ba comunidade vísiu ruma husi kultura ambiente nian. Iha comunidade Corinto nian, ita haree difikuldade fiar sarani nian atu integra an iha ambiente inimigu nian, marka ho kultura jentiu no ho valór sira ne’ebé kontráriu ho mensajen Evanjellu nian.

Iha 1 Cor 6,12 aparese iha fraze ida – possivelmente Paulo rasik nian – ne’ebé sarani balun Corinto nian uza atu justifika sira nia hahalok laloos esesu nian: «Ha’u bele halo buat hotu»... Paulo esplika katak “«ha’u bele halo buat hotu», maibé la’ós katakbuat hotu konveniente; «ha’u bele halo buat hotu», maibé ha’u lakohi sai atan ba buat ida”. Tuirmai, Paulo fó hanoin ba sarani sira comunidade nian ezijénsia sira adezaun ba Kristu.

MENSAJEN

Kestaun fundamentál, ba Paulo, mak ne’e: hodi Batizmu, sarani ida sai membru Kristu nian no forma ho Nia isin ida de’it. Husi momentu ne’e, hanoin sira, liafuan sira, atitute sira sarani ida nian tenke sai hanesan ho ida Kristu nian no tenke fó sasin, iha mundu nia oin, Kristu nia An rasik. Nune’e, iha sarani nia “isin” manifesta, realidade Kristu nia “isin”.

Husi sorin seluk, ema sarani sai mós Templu Espíritu nian. Ba judeu sira, “templu” Jerusalém nian mak fatin Maromak horik bá no manifesta An ba nia Povu... Hateten katak sarani sira mak “Templu Espíritu nian” signifika katak sira oras-ne’e sai fatin Maromak horik bá no fatin atu manifesta Maromak nia moris. Iha Batizmu, ema sarani simu Maromak nia Espíritu; no Espíritu ida-ne’e mak, husi instante ida-ne’e, lori nia iha dalan sira moris nian, inspira ninia hanoin sira, kondisiona ninia hahalok no komportamentu sira.

Iha-ne’e mak ita hetan elementu fundamentál antropolojia sarani nian... Ema nia “isin” mak fatin iha-ne’e manifesta realidade moris foun ne’ebé hakonu fiar-na’in nia moris, iha istória, depoizde ninia adezaun ba Kristu. Ema nia “isin” la’ós buat ruma atu despreza, folin-laek, dodok, atu kondena – tuir liña filozófika sira sidade Corinto nian; maibé buat ruma ho dignidade aas, basá iha nia mak hatudu ba mundu realidade Maromak nia moris nian. Iha

sarani ida ne'ebé moris iha komuñauñ ho Kristu, iha sarani ne'e nia "isin" – liuhusi ninia liafuan no hahalok sira – mak hatudu moris foun ne'ebé Maromak hakarak propoin ba mundu no oferese ba ema sira.

Husi-ne'e, Paulo foti konsekuénsia sira ne'ebé bele aplika ba situasaun konkreta fiar-na'in sira Corinto nian, ne'ebé dalaruma hetan tentasaun husi komportamentu imorál sira, iha ámbitu moris seksualidade nian... Se sarani sira mak membru Kristu nian no se sira moris iha komuñauñ ho Kristu, komportamentu la tuir morál iha área seksualidade nian la iha sentidu liu; se sarani sira mak "Templu Espíritu nian" no sira-nia isin mak fatin atu hatudu moris foun husi Maromak, atitude no toman aat/dezordenadu ruma la dignifika sarani sira nia moris.

Iha sarani sira nia "isin" tenke manifesta Maromak nia moris. Nune'e, buat hotu ne'ebé sai espresaun egoísmu nian, buka lahó freiu interese rasik, halo tuir kaprixu rasik hodi la kontrola an, komportamentu sira ne'ebé uza no instrumentaliza ema seluk, mak kontradisaun boot ba moris foun iha Maromak, moris foun ida iha saran an no kompromisu, iha domin loos. Sarani sira mak ema livre; maibé liberdade sarani soi nu'udar limite Kristu rasik. Sarani sira tenke konxiente katak hahalok radikalizmu liberdade nian dalabarak remata ho moris-atan/eskravidaun.

Ita-nia testu taka ho konvite ida: "hahí Maromak iha imi-nia isin" (vers. 20). Liuhusi komportamentu no atitude sira ne'ebé hatudu realidade moris foun Jezús nian mak sarani sira "hasae kultu" ba Maromak. "Kultu" ba Maromak la liu husi prátika ritu esternu sira, maibé liuhusi kompromisu moris nian ne'ebé afeta ema tomak, ninia relasaun ho maun no biin-alin sira no ho an rasik. Iha sirkunstánsia hotu – inklui iha kampu moris seksualidade nian – sarani nia moris mak, saran-an, respeitu, servisu, domin loos. Ida-ne'e mak kultu ne'ebé Maromak ezije.

EVANJELLU – Jo 1,35-42

Pasajen/ períkopa ne'ebé propoin mai ita ohin integra sesaun introdutória Evanjellu Dahaat nian (kf. Jo 1,19-3,36). Autór buka ho nia matenek, hatán ba kestaun "Sé mak Jezús?"

João monta kuadru ida iha ne'ebé personajen ida-idak tama iha palku hodi aprezena Jezús. Nia lori atór ida-idak tama iha palku hodi halo afirmasaun nakonu ho signifikadu teolójiku kona-ba Jezús. Kuadru finál ne'ebé rezulta husi intervensaun oioin aprezena Jezús nu'udar Mesias, Maromak nia Oan, ne'ebé soi Espíritu no mai hasoru ema sira atu hamosu Ema Foun, moris husi bee no Espíritu.

João Batista, profeta/prekursór Mesias nian, hala'o papél esepiál ida iha aprezenasaun Jezús nian (ninia sasin mosi iha hahú no rohan sesaun nian – kf. Jo 1,19-37; 3,22-36). Nia mak define Ida-ne'ebé to'o mai no aprezena ba ema sira.

Ita-nia testu aprezena mai ita dixípulu dahuluk na'in tolu Jezús nian: André, dixípulu ida la identifika sé no Simão Pedro. Rua uluk mak João nia dixípulu sira no liuhusi ninia indikasaun sira bá tuir Jezús. Ne'e mak kuadru ida vokasaun nian ne'ebé diferente husi relatu kona-ba dixípulu dahuluk sira nia bolun aprezena iha sinóptiku sira (kf. Mt 4,18-22; Mc 1,16-20; Lc 5,1-11). Autór Evanjellu Dahaat nian, liufali reportajen akontesimentu konkretu ida, hakarak aprezena iha-ne'e modelu ida bolun nian no tatuir Jezús nian.

MENSAJEN

Iha momentu dahuluk, kuadru situa ita iha mota Jordão (vers. 35-37). Personajen dahuluk na'in tolu mak João no dixípulu na'in rua – katak, mane na'in rua ne'ebé rona João nia anúnsiu no simu ninia batizmu, símbolu haketak an ho "moris tuan" no adezaun ba Mesias

ne'ebé sira hein. Dixípulu na'in rua João nian ne'e, mak ema sira ne'ebé liuhusi João nia sasin, adere tiha ona ba Mesias no hein de'it atu Nia hatudu An no hahú nia obra. Hafoin Jezús mosu. João haree Jezús “ne'ebé liu” no nia hatudu ba ninia dixípulu sira hodi dehan: “ne'e mak Maromak nia bibi-oan” (vers. 36). João mak figura estátika no nia misaun mak prepara de'it ema nia fuan atu simu Mesias libertadór; bainhira Mesias ne'e “liu”, João nia misaun remata no hahú realidade foun. João konxiente kona-ba ne'e... Nia la buka hanaruk ninia protagonizmu eh konserva ba nia an dixípulu sira ne'ebé tuir nia. Nia hatene nia misaun mak prepara ema sira nia fuan atu simu Jezús no ninia proposta libertadora. Tanba nee, iha okaziaun loos nia hatudu Jezús ba nia dixípulu sira no konvida sira atu tuir Nia.

Espresaun “ne'e mak Maromak nia bibi-oan”, refere ba “bibi-oan páskua”, símbolu libertasaun ne'ebé Maromak oferese ba nia Povu, dadur iha Ejitu (kf. Ex 12,3-14. 21-28). Espresaun ne'e define Jezús nu'udar Ida-ne'ebé Maromak haruka, atu inaugura Páskua foun no realiza libertasaun definitiva ema sira-nian. Jezús nia misaun konsiste atu halakon kadeia sira egoizmu no salan nian ne'ebé dadur ema iha moris-atan no impede sira to'o ba moris nakonu.

Liutiha João nia deklarasaun, dixípulu sira rekoñese Jezús nu'udar Mesia no tuir Nia. “Tuir Jezús” mak espresaun téknika ne'ebé autór Evanjellu Dahaat aplika, ho frekuénsia, ba dixípulu sira (kf. Jo 1,43; 8,12; 10,4; 12,26; 13,36; 21,19). Signifika la'o iha Jezús nia kotuk, tuir dalan hanesan domin no saran an nian ne'ebé Nia halo, adopta objetivu hanesan Jezús nian no kolabora ho Nia iha misaun. Dixípulu sira tuir kedas, la duvida, la husu esplikasaun, la buka garantia... Sira simplesmente “tuir” Jezús.

Iha momentu daruak, kuadru apresenta mai ita diálogu ida entre Jezús no dixípulu na'in rua (vers. 38-39). Ba Jezús nia pergunta inisiál (“imi buka saida?”) sujere katak importante, ba dixípulu sira, iha konxiénsia kona-ba objetivu ne'ebé sira hakarak to'o, saida mak sira hein husi Jezús. Autór karik hakarak dehan katak, iha ema ne'ebé tuir Jezús ba motivu laloos, hodi buka iha Nia realizasaun ba objetivu pesoál dook husi oferta ne'ebé Jezús mai halo.

Dixípulu sira hatán ho pergunta ida (“rabbi, ita hela iha ne'ebé?”). Iha ne'e, implísitu sira-nia vontade atu adere totalmente ba Jezús, atu aprende ho Nia, atu hela ho Nia, atu estabelese komuñau moris nian ho Nia. Hodi bolu Nia “rabbi”, sira hatudu katak sira dispostu atu tuir Ninia hanorin sira, aprende ho Nia modu ida moris nian; referénsia ba Jezús nia “hela-fatin” indika katak sira dispostu atu hela besik Jezús, partilla ninia moris, moris iha ninia influénsia okos. Ne' mak afirmasaun ida ne'ebé hatudu adezaun inkondisionál ba Jezús no sai nia dixípulu.

Jezús konvida sira: “imi mai haree”. Jezús nia konvite signifika katak Nia aseita dixípulu sira nia intensaun no konvida sira atu tuir Nia, aprende ho Nia, partilla Ninia moris. Dixípulu sira tenke “bá” no “haree”, basá identifikasaun ho Jezús la'ós buat ruma ne'ebé ema ida bele to'o liuhusi informasaun simples de'it, maibé buat ruma ne'ebé bele to'o hodi de'it esperiénsia pesoál komuñau no enkontru ho Nia.

Dixípulu sira aseita konvite no halo esperiénsia partilla moris nian ho Jezús. Esperíénsia direta ne'e konvinse sira atu hela ho Jezús (“sira hela ho Nia loron ne'e”). Nune'e, moris mai comunidade Mesias nian, comunidade aliansa foun nian. Ne'e mak comunidade ema sira ne'ebé hasoru Jezús ne'ebé liu, buka iha Nia moris loos no liberdade loos, identifika an ho Nia, aseita atu tuir Nia iha nia dalan domin no saran an nian, dispostu ba moris foun komuñau total ho Nia.

Iha momentu datoluk (vers. 40-41), dixípulu sira sai sasin. Ain-hakat ikus iha “dalan vokasionál” mak ida-ne'e: ema ne'ebé hasoru Jezús no esperiemnta komuñau ho Nia, labele la husik nia an nakfilak sai sasin Ninia mensajen no proposta libertadora. Esperíénsia ne'e marka tebes sira-nia moris nune'e labele rai de'it ba an rasik no nakfilak ba anúnsiu libertadór ba maun-alin sira. Enkontru ho Jezús, se loos duni, lori nafatin ba dinámika misionária ida.